

四庫全書

集部

欽定四庫全書

集部

宋詩鈔卷四十六

詳校官中書_臣賈鏐

主事銜_臣徐以坤覆勘

總校官編修_臣王燕緒

校對官中書_臣劉源溥

謄錄監生_臣鄭家屏

欽定四庫全書

宋詩鈔卷四十六

內閣中書舍人吳之振編

唐庚眉山詩鈔

唐庚字子西眉州丹棱人年十四能詩文賦明妃曲
題醉仙崖諸作老師匠手皆畏之中紹聖進士為州
縣官至大觀始入為博士張商英薦其才除提舉京
畿常平商英罷相庚坐貶安置惠州會赦復官承議

郎提舉上清太平宮歸蜀道病卒年五十一自南遷
海表詩格益進曲盡南州景物略無憔悴悲酸之態
劉潛夫謂其出稍晚使及坡門當不在秦晁下今觀
其結束精悍體正出奇芒燄在簡淡之中神韻寄聲
律之外雖云後出固當勝爾

憶昔行

憶昔方東來亭傳荒荆棘風庭紅葉乾雨砌蒼苔溼飢
虎撥門開哀禽向人泣十載却西還亭傳已完葺青鎖

揖江山朱欄起階級行旅糧不齎大路遺敢拾蜀道無
難易人心自寬急寄信守亭者勿使狐狸入

張求

張求一老兵著帽如破斗賣卜益昌市性命寄杯酒騎
馬好事人金錢投甕牖一語不假借意自有臧否雞肋
乃安孝未省怕嗔毆坐此益寒酸餓理將入口未死且
強項那暇顧炙手士節久凋喪舐痔甜不嘔求豈知道
者議論無所苟吾寧從之遊聊以激衰朽

黎城酒

黎城酒貴如金汁，解盡寒衣纔一吸。
獄曹參軍到骨窮，簿書吻燥何由溼。
夜來細雨落簷花，對客惟有啜春茶。
明朝踏月趁早衙，免使路中逢麴車。

晝寢效魯直

雨餘熱喘殊喊呀，坐翻故紙腰足麻。
鋪陳枕簟罽青紗，倒牀不復知橫斜。
夢魂飛揚遠還家，故人見我一笑譁。
須臾睡覺衙鼓撾，牆頭暝雀聲槎槎。

城上怨

雨似懸河風似箭風號雨馳寒刮面何處巡城老健兒
城上謳吟自哀怨不知底事偏苦傷聲高聲低哀思長
戍邊役重畏酷法去國年多思故鄉城上歌時夜方半
正是孤齋醉魂斷和風和雨兩三聲推枕投衾坐長歎
傳聞黠敵動熙河戰士連年不解戈今夜風號雨馳處
城上哀怨知幾何

客至

山頭竹萬箇風來玉相戛下有屋數間蕭然如佛刹門
無車馬喧幽徑芳草出隔牕識君聲遽起投筆札黃鸝
未啄秦環堵無可殺園蔬煮淡泊山泉啜甘滑何以樂
嘉賓春禽日嘲哂

聞東坡貶惠州

元氣脫形數運回天地內東坡未離人豈比元氣大天
地不能容伸舒輒有碍低頭不得仰閉口焉敢頽東坡
坦率老局促固難耐何當與道俱逍遙天地外

寄郭潛夫

我等游瀘江泛舟奔楚宮黔江自南來胥會涪之東黔
江清且碧瀘江濁而紅紅碧不相入分流如卧虹羣豬
激湍濤洶湧成戰攻須臾盡變濁混混顏色同清固不
勝濁此理天下通君視開成間牛李爭長雄要之贊皇
子不勝太牢公物理自古然徘徊歎無窮

送趙元思司法

誰不從王事夙夜獨匪懈休沐猶坐曹伏日不歸廨平

生熟大法餘事止小楷自稱霹靂手作縣真癖疥董宣
雖強項臨事中實駭從君學吏禮稍稍識起拜今當告
別去何以贈行邁二十罰自親此理須少戒

到任後寄家兄

君子所就三為食最為下起家仰寸祿此實下焉者南
山無傲廬千里就館舍但使食有魚敢言曹乏馬同寮
皆故人每事相假借况復官長賢醉歸應不罵

送趙安道下第

大官危小官卑君不得官君勿悲君不見前日宰相今
海涯胡椒八百斛流落知為誰又不見州縣官折腰事
細兒常憂一語不中治敢對西山笏拄頤大官危小官
卑君不得官君勿悲願君酒量如鴟夷勿作瓶甕居井
湄與君賭取醉為期明日烏帽風披披

中秋遇雨感懷呈世澤彥直

初遊東都年二十清歡趣得中秋及南陽會中酒徒集
惠和坊裏綉鞍入盤螯嘗新左手執鶉頭未老接玉粒

杯行到手不待揖明月清風供一吸纏頭不惜傾箱給
倚賴決科如俯拾誰知得官反拘繫此景此歡那復緝
今歲中秋雨如泣窮山牢落秋光濕孤燈熒熒照書笈
屈指流年如箭急

讀邸報

當今求多聞取士到蓬華時時得新語誰謂山縣僻昨
日拜御史今日除諫官立朝無負漢恩厚論事不妨晁
民安臺省諸公登袞袞閉門熟睡黃紬穩

訊囚

參軍坐廳事據案嚼齒牙引囚到庭下囚口爭喧譁參
軍氣益振聲厲語更切自古官中財一一民膏血為吏
掌管鑰反竊以自私人不汝誰何如摘領下髭事老惡
自張証佐日月明推窮見毛脈那可口舌爭有囚奮然
出請與參軍辨參軍心如眼有睫不自見參軍在場屋
薄薄有聲稱只今作參軍幾時得騫騰無功食國祿去
竊能幾何上官乃容隱曾不加譴訶囚今信有罪參軍

宜揣分等是為貧計何苦獨相困參軍噤無語反顧更
卒羞包裏琴與書明日吾歸休

喜雨呈趙世澤

去年雨多憂水潦今年雨少憂枯稿都緣縣政失中和
水旱年年勤父老前時雲起雨欲落夜半風來還一掃
明朝引首望雲漢屋上晨暾仍杲杲賦輸百萬未破白
薄脚何緣得勾倒上書自効欲歸去老婦挽衣徇奪藁
技窮往訴北山神是夕沛然霽所禱稻畦穠極勢已活

竹裏蕭疎聲更好故應神意閑孤拙苟免歲終書下考
便安杵臼伺秋成雲子滿田行可擣

蓬州杜使君洪道屢稱我于諸公聞之愧甚為詩
謝之

去天一尺古蓬州年來除守得勝流渠家本是城南杜
詩律賢我三千籌如此才高却解事入眼人才皆可意
他邑猶分刺史天片言每為將軍地故應憐我退無田
力相推挽令向前傷人聞說皆撫掌竹竿那使鮎魚緣

嘲陸羽

陸子作茶經竟為茶所困其中無所主復著毀茶論簡
賢傲長者彼自愚不遜茶好固自若于我有何恨便當
脫野服浣瓊為一獻飲罷挈茶去譬彼澆畦碗君看襴
正平意氣真能健達與不達人何啻相千萬

戊子大水

踏歌喧喧雜鐃鼓潭邊呼龍今作雨龍噴揮水十丈餘
千村萬落幾為魚寄謝龍神且安處熟睡深潭不驚汝

夜半傳呼河入室攬衣下牀深沒膝舊來水不到譙門
老巫歸咎西門君西門君去老巫舞明年却娶河伯婦
除鳳州教授非所欲也因作此以自寬

人生纔食頃何處分好弱刑獄即道場堯庫有真樂故
紙終日翻毛錐幾年閣百函無力致諸公誰說著今承
學授之頗訝名字錯宿業豈無應得治不敢躍骨肉遠
難俱囊裝貧易縛師儒要好手老大良非脚更盡識羹
空抽窮知繭薄後生端所畏人材若為作豈惟嘲孝先

便恐困有若行路固知難得地幸不惡柳拖千丈絲山
集五色雀絳紗諒無有首蔭聊可嚼况聞豆積嶺中有
不死藥

將家遊治平院

蓋老杜所謂東津也

年來官職如水樣只有登臨作酌賞好山一一如佳士
令人欲作傾家釀昨日西樓弔王孫今日東津悲逐臣
江邊勝事略尋偏不見海棕高入雲

受代有日呈談勉翁謝與權

老來忽忽流年緊三見涪江秋葉隕祇緣二子日相從
便覺一瓢窮可忍東津曉作招隱賦西樓莫得思歸引
文字能令酒盞寬江山未放詩才窘分題踴躍誰避席
得句歡呼同破準泉名三逸本戲語野史千年傳不泯
醉歸半路飛蝙蝠餘興中宵伴蚯蚓那知須鬢禿于筆
但見兒童長如笋畱滯甘為西域胡衰遲更結東遊鞞
故山咫尺未成歸坐使蒼顏厚如脣

與舍弟飲

溫酒澆枯腸戰戰生小詩詩中何等語酒後那得知黃
菊遂行邁徑去不復辭拒霜猶屈強其勢何能為但問
酒有無勿計官高卑江邊捕魚郎教我當啜醢

劍州道中見桃李盛開而梅花猶有存者

桃花能紅李能白春深何處無顏色不應尚有數枝梅
可是東君苦畱客向來開處當嚴冬桃李未交遊中
即今已是丈人行肯與年少爭春風

武興歌

去年山中無黍稷只有薤根并橡實薤根作麪如食蜜
橡實炊飯如剝栗東家有錢食橡實西家無錢惟食薤
今年都盡橡食貴山中人作寒蟬枯

既以前韻贈勉翁復懷庭玉因為次韻

千金駿骨買虛名驥老通衢價未平
逐去定知窮不死
向來元以句為生東風又見鶯朋友
北信難憑雁弟兄
欲寄此懷惟有月天涯分與故人明

游仙雲宮

出郭三竿日橫江一葦航
雀飛田有麥蠶罷野無桑
下馬危梯滑開門古殿香
雨餘丹井溢苔入醺檀荒
畫老星辰動碑殘歲月亡
鍾聲落城市符祝走村鄉
莖鳥啼巴蜀山崖刻漢唐
臨歸更回首惜此一襟涼

直舍書懷

寸枉非吾志休論尺與尋
黃披終日卷青對十年衿風
眩藥囊減雨昏茶椀深
揚雄名宦思都向草玄沈

箇處本來冷此時仍更清
擁爐成久坐曳杖却徐行
暝色侵書帙秋陰入鼓聲
悠然索馬去祇此是功程

夜坐感懷

聲斷鍾樓月文書對坐時
破牕燈焰走凍研筆鋒遲
名利髮將鶴風霜手欲龜
何當一蓑雨披曉翦蓴絲

迷懷

名字雖云繫別曹
儒風門戶只蕭騷
頭顱自揣宜藏拙
指目何妨笑養高
本以食貧來仰祿
豈于王事更辭勞

老來精力堪驚歎一紙文書輒數遭

秋夕書懷

亶亶歲華侵垂垂老境臨時光自風雨寒色到衾裯
萬竅號秋杪孤燈照夜深蛩聲亦清苦唧唧伴人吟

過田橫墓

成則為王敗則亡英雄成敗本尋常滄溟無際何妨死
却死東郊未耿光

九江梁楚竟誅夷自古才高必見疑脫使酈生猶未死

將軍來此亦何為

和程大夫荔枝

家在岷峩飽荔枝十年遊宦但神馳側生流落今千載
入貢稱珍彼一時定自不將凡果比如何偏與瘴烟宜
白頭莫作江南客辜負山中故友期

寓精道齋有感懷家山

論兵作賦兩怱怱人事光陰轉首空半夜夢飛山色裏
一年秋在雨聲中揚州騎鶴非無意上蔡牽黃信此窮

幸有林泉未歸去欲將清興問征鴻

悠悠功業老堪憐舊事憑誰可共論直欲酒中賒快樂
尚能花裏覓寒溫詩書悞我成何事歲月侵人不見痕
汾水年年秋雁到庾郎何處不銷魂

晚春寄友人

眼底春愁惱殺儂揚州往事旋成空風流只合稱狂客
衰颯何堪作病翁水國春深梅子雨江天日暮鯉魚風
何時執手同樽酒收拾清歡笑語中

滿眼蕪菁斷送春多情饒病兩關身只知老去人心改
不覺愁來酒盞頻霜鶻空拳知有命溟魚竭水恐傷神
丈夫出處端無據猶欲辭家再入秦

春日雜興

愛梅長恐着花遲日禱春風莫後期及得見梅還淡冷
東風全在小桃枝

茸茸小雨弄春晴已有狂花未見鶯便使一年惆悵在
曉牕寒夢別輕盈

短帽輕衫信馬行郊原春色太牽情
兔葵燕麥渾閒事最有蕪菁到處生

月團新碾破春醪賴有歸鴻寄好音
人在天涯莫回首恐偷華髮上瑤簪

別閩中許秀才

臨岐長歎息此歎意深微浮世年年別
初心事事違捫參蜀道遠犯斗海槎歸
故國有餘樂黃鸝秋正肥

灌息軒

仙家林館碧雲圍，掃却浮塵晝掩扉。
萬事年來俱是幻，一瓶朝汲已忘機。
花深曲徑春無盡，人在閒庭鳥不飛。
見說漢陰今復有，欲凌霄漢挹清輝。

書新堂

疊茅重葦一堂新，設榻聊安簿領身。
落枕不知鶯樹曉，污書長苦燕泥春。
嶽官何預青苗事，野意新便白葛巾。
能向此間時得趣，何須分外拜車塵。

除夕感懷

永漏侵春已數籌地爐猶擁木棉裘無心豈畏三屍訴
愛日還驚一歲休故國二千空醉眼新年三十恰平頭
光陰未用相敦迫領取衰翁兩鬢秋

春日郊外

城中未省有春光城外榆槐已半黃山好更宜餘積雪
水生看欲倒垂楊鶯邊日暖如人語草際風來作藥香
疑此江頭有佳句為君尋取却茫茫

自笑

已白窮經首仍丹許國心那能天補綻更欲海填深
兒餒嗔郎罷妻寒望藁砧世間南北路何用爾沾襟

直舍夜坐

強仕似幼學細書仍短檠月來吟處白風及醉時清
坐久露微溼更深秋有聲不知愁底事終日自悲鳴

內前行

以後係
惠州詩

內前車馬撥不開文德殿下宣麻回紫薇侍郎拜右相
中使押赴文昌臺旄頭昨夜光照牖是夕收芒如禿筭

明日化為甘雨來官家喚作調元手

右相視事明日始得雨喜甚書商霖

二大字賜之

周公禮樂未要作致身姚宋也不惡向來兩翁

當國年民間斗米纔四錢

長沙示甥郭聖俞

我昔官閬中子時趨長安相過日夜飲肯使笑語乾但
知醒復醉誰問甜與酸攬衣步中庭仰首羨飛翰並言
早歸休慎勿貪高官時未有添丁眼前惟木蘭甥舅一
分背日月雙跳丸那知十年外相見西江千拜起未寒

溫悲來各汎瀾我髯已禿翁子顏非渥丹相從海上志
茲事人所難阪行白漭漭山宿青攢攢人烟小歲後草
木深冬完昨日次長沙扁舟掠湘灘中流遭惡風滿衣
潑驚湍船如箕尾點天作車輪團怖畏目敢側禱祈指
頻彈向非鬼神助幾作蛟龍食忠信時可憑聖賢豈吾謾
勿畏嶠南熱我清物自寒勿憂海邦陋心廣身亦寬磨
刀砍鯨鱸隱几看鵬搏努力近藥物明年理歸鞍得之
兩鴻鵠龜筒不須鑽

張曲江鐵像詩

像在韶州韶人相傳
明皇悔時所鑄云

開元太平久錯處非一拍就令乏賢人何至相仙客直
道既凋喪曲江遂疎斥汲黯困後薪賈生罷前席金鑑
東高閣鐵胎空數尺妙處難形容英表良髣髴摩挲許
國姿尚想立朝色同時反棄置異代長歎息

湖上

佳月明作哲好風聖之清湖邊得二友夜語投三更烟
露兩相溼水天參互明散衣芭蕉涼曳杖桺榔輕星走

拋餘光山空答虛聲歸矣不可畱過幽恐神驚

雙榕

水東雙榕間有叟時出遊清風衣屨古白雪鬚髯虬吟
哦明月夕簾弄寒江秋驚傳里中兒不泊岸下舟君看
鬼趣中有此風味不安知非黃石但恨無畱侯此生鉏
犂手誤入簪紳流無功折毫髮負罪平山丘政爾求澡
濯聞之歎綢繆摳衣倘可親跪履安敢羞得聞半偈語
一解終身憂性不喜伐國兵書非所求

大熟行

去年大雪埋尺箠水北荔枝遭凍死共嗔北客帶寒來
我欲分疏誰受理今年諸峒十分熟東江不下龍川米
南翁北客兩欣然孰與忍飢食荔子

蜜果

臣聞失旦雞已曉猶強鳴書生坐口窮抵死輸血誠嶺
南貢蜜果海道趨彤庭黃蜂樂受職紫鳳助揚舲忠勤
雖云至思慮良未精由來瘴癘鄉不識霜雪情土風不

待講氣象昏如醒
杭稻杭稻熱水泉
水泉腥而况野果
實豈足奉聖明
未論體性殊已覺面目生
食之倘有補勞者
甘如飴政恐無裨益
所出非和平上林寧少此
下箸安可輕軒轅
嘗百毒上古雜神靈
武王嗜鮑魚幾諫
仗老成芻蕘復何有
葵藿但自傾

圓蛤

黃犢鳴水中相顧皆愕然
探之亡所得有蛙僅如錢
持問傍舍翁云此號圓蛤
夏潦漲溝渠喧呼自酬答
卒然

聞其聲謂當可專車既見一撫掌寸莛量有餘物生元
氣中小大各異趨蛙質黃牛鳴持此欲誰附我居固已
陋爾鳴良亦村綿蠻轉黃鸝我今思故園

白小

二年遵海濱開眼即浩渺謂當飽長鯨餬口但白小百
尾不滿釜烹煮等芹蓼咀嚼何所得鱗鬣空紛擾向來
巨魚戲海面橫孤嶠噉噴飛沫白雨散晴曉終然不
省錄從事此微眇短長本相形南北無定表泰山不為

多毫末夫豈少詞雄兩月讀理足三語妙人生一漚發
誰作千歲調安能蹲會稽坐待暮年釣

瘡疾寄示聖俞

體中初微溫末勢如湯鑊忽然毛髮起冷撼如振鐸良
久交戰罷項背如釋縛尚覺頭涔涔眉額如鏡鑿空日
一寒暑有準如契約伏枕兩晦朔枵然如空橐平生十
圍腰病起如飢鶴衰髮本無幾脫去如秋籜到今僅能
步出沒如尺蠖舊聞五嶺法有此萬戶瘡而我自僑寓

了不蒙潤略况子有持養何至亦例著此身自空虛客
疾安所托請作如是觀無病亦無藥

示蜚

先君捐館年六十畸三算我今四十三始得幼子蜚餘
齡繼前躅蜚也纔及冠况復未可知孝章積憂歎祿養
豈不欲茲事覺已緩但愛眉目秀體質淨如盥顧瞻既
精神懷抱亦氣岸今者新剔髮瑩若珠未貫見之令人
清面擁疲手腕輒然攬吾鬚霜雪落几案豈惟不肯嗔

更對一笑粲骨肉今已矣持汝慰奔竄行當從諸兄誦
書喧里閤而我于經術麤能分句斷發蒙要師資心孔
為關鍵許慎專偏傍張華休史漢吾家業儒久捨此無
別段不應緣一啞便欲廢炊爨及親三釜足未用萬戶
鄮人生百年期我今持未半

夢泉

并引

潮陽尉鄭太玉夢至泉側飲之甚甘明日得之東山
上因作夢泉記示余命作此詩

入道肯着相出神得佳泉起尋定中境漫意山之巔四
人跼蹴數里聞潺湲循聲到巉絕滿意流甘鮮雖深
石可數太察魚難筌分爲縞練去濺作珠璣圓一窺宿
醒解三嚙沈疴痊恍惚尚疑夢歡呼欲成顛山間知予
井海飲鹹生涎那知道在邇幾作野遺賢事故由人興
物爲知己妍誰陪濠上游詠攜室中天雖無十丈花中
有一滴禪名酒覺殊勝宜茶定常煎蘭亭羽觴冷魚復
青筒連新文來遠矣開卷猶潏然徑欲抱琴去臨流聽

未全不但受以耳庶幾神者先寫為夢泉操第入樂府
篇將前輒復却萬事付有緣

鳴鵲行

簷前羣鵲鳴相呼法當有客或遠書吾今何處得書尺
而况賓客乘軒車平生眼中抹泥塗泛愛了不分賢愚
卒為所賣罪滿軀放逐南越烹蟾蜍百口寄食西南隅
三年莫知安穩無家書已自不可必更望故人雙鯉魚
故人頃來絕能疎况復萬嶺千江湖雞肋曾是安拳餘

至今畏客如於菟豈惟避謁謝還住此日誰肯窺吾廬
杜門却掃也不惡何但忘客兼忘吾喧喧鳴鵲汝過矣
曷不往噪權門朱

採藤曲效王建體

魯人酒薄邯鄲圍西河渡橋南越悲歲調紅藤百萬計
此貢一作無窮時去年採藤藤已乏今年採藤藤轉竭
入山十日脫身歸新藤出土拳如蕨淇園取竹況有年
越山採藤輸不前今年輸藤指黃犢明年輸藤波及屋

吾皇養民如養兒鑿空為此謀者誰

冬雷行

百蟲蟄處安如家阿香夜起推雷車一時技癢不忍爬
撼動尺蠖掀龍蛇龍蛇尺蠖踞已久亦欲奮迅舒頑麻
夢中一震忽驚躍發破墻戶排泥沙泥沙已出雷遽止
錯愕欲去難藏遮蟲蛇狼狽莫知數間有伏龍吁可嗟
贈譚微之

去年絃歌程水濱甌中生塵范史雲今年講學鷺城裏

關西孔子楊伯起昔人論士觀心期時人論士看肉皮
只知黃鵠矜背爪不識騶虞避生草

北歸至廣州寄惠州故人

歸心如躍馬奮迅不可駐別情如放猿已去猶返顧三
年孺子社數借柱史書好在五噫孫善保千金軀舊來
談天口老去盡地力萬里不相忘寄聲問眠食

南遷

去去寬鄉托此蹤關中無地頓衰翁未誅綺語猶輕典

更賜羅浮有底功
蝦菜賤時皆丙穴
茅柴美處即郛筒
著鞭要及春前到
趁賦梅花庾嶺東

渡沔

鶴歸遼海悲人世
獨入巴山叫月明
惟有沙蟲今好在
往來休並水邊行

武陵道中

朝持漢使節暮作楚囚
奔路入離騷國
江通欸乃村垣
牆知地溼草木
駭冬溫寂寞桃源
路行人祇斷魂

長沙道中

古古今今路朝朝莫莫行
橘林香處飯杉木翠邊程
山帶湘靈慘川含楚些清
江湖無限句遷客要才情

次泊頭

何處不堪老浮山傾蓋親
潮田無惡歲酒國有長春
草木疑靈藥漁樵或異人
近前端有得丞相未宜嗔

初到惠州

盧橘楊梅乃爾甜
官容遷謫到眉尖
因行採藥非無得

取足看山未害廉
辯謫若為家
一喙著書不直字
三縑
老師補處吾何敢
政為宗風不敢謙

謝人送酒

世情不到海邊村
載酒時來餉子雲
便欲醉中藏潦倒
已將度外置紛紛
細思擾擾膠膠事
政坐奇奇怪怪文
喚取鄰翁傳杓飲
漸令安習故將軍

水東感懷

往事孤峰在流年
細草頻但知其室
邇誰識所存神碑

壞詩無敵堂空德有隣
吾今稍奸黠終日酒邊身

登栖禪山

海雨山烟撥不開
眼前遮定

一作盡

望鄉臺如何借得維

摩手斷取西南故國來

收景初書并示藥物

乾坤心腹友江海鬢毛班
藥補他鄉闕書開故

一作去國

顏何時乘下澤此日仰高山
曾是歸耕耦由來有賜環

九日懷舍弟

重陽陶令節單闕賈生年秋色蒼梧外衰顏紫菊前登
高知地盡引滿覺天旋去歲京城雨茱萸對惠連

收家書

西州消息到南州骨肉無它歲有秋驥子解吟青玉案
木蘭堪戰黑山頭即時旅思春冰拆昨夜燈花黍穗抽
從此歸田應坐享故山已為理菟裘

瀘人何邦直者為安溪把截將有功不賞反得罪

來惠州貧甚吾呼與飲為作此詩

楚人季布以勇顯魯國朱家用俠聞馳馬彎弓臣好武
吹毛洗垢吏深文王孫此日誰漂母卿子前時號冠軍
滿引一杯齊物論白衣蒼狗任浮雲

余在惠州作酒二
種其和者名養生

主其稍勁者名齊物論
後集主字遂志其一

除夕

患難思年改龍鍾惜歲徂關河先龍遠天地小臣孤
道憑溫酒時情付擁鑪南荒足妖怪此日謾桃符

入日

人日傷心極天時觸目新殘梅詩興晚細草夢魂春挑
菜年年俗飛蓬處處身墓頤頻語及髣髴到東津

栖禪暮歸書所見二首

雨在時時黑春歸處處青山深失小寺湖盡得孤亭
春著湖烟膩晴搖野水光草青仍過雨山紫更斜陽

白鷺

說與門前白鷺羣也知從此斷知聞諸君有意除鉤黨
甲乙推求恐到君

有所歎

林中宴坐老沙門，豈願臨年觸垢氛。
正恐先生不得飽，欲令後死與斯文。
近逃台鼎居東洛，聞道衣冠滿北軍。
須信此塗天一握，人間漫說有孤雲。

耕田佩印兩徒然，憶想平津只去年。
怪底功名稱地獄，誰將官府到天仙。
是非已付漁樵判，疑信難憑黨與傳。
杯酌豈能通大道，牀頭當得酒如泉。

舍弟書約今秋到此

此日方收信前時已具舟開頭今幾月軟脚定中秋涼
德為兄忝炎荒為爾憂從今西望眼應到見時休

夜坐懷舍弟

無雲仍露坐有月更江臯沈陸傷吾道浮生憶爾曹扁
舟應夏口此夕數秋毫不見今三載當時已二毛

送外甥之廣州

由也久從我牢之真有甥時情為客老秋色進泉清撥
刺朝朝味鉤輈處處聲越臺休弔古旅魄向來驚

九日獨酌

登高無老伴引滿自高歌歡意天邊少重陽野外多黃
花空歲月白首尚闕河他日龍山興吾今在網羅

壬辰九月二十三日天氣始寒以詩記之

朝來怪底冷前此已重陽漸逼袴襦節稍聞灰火香烟
嵐向冬淨橘柚得霜黃嶺表雖多暑天時亦有常

寄潮陽尉鄭太玉

又種羅浮一熟田江陽未得返耕屨書來似見眉間印

別後新增鬢上年下澤有車人誤矣上林無報雁徒然
去歲引咎自陳無報越巫鷄卜聞之久為問行藏若箇邊

次鄭太玉見寄韻

度外歸期未要論故山石笋自高蹲他時名譽牛心炙
晚歲窮空犢鼻褌君有詩書并畫絕我無德爵但年尊
音塵不繼應相悉萬事而今付默存

壬辰九月不雨至巳年三月穡事去矣今夕輒復
沛然喜甚卧作

老去生涯白木鐺
脫逢艱食更何堪
春深野色憂年惡
夜半簷聲覺雨甘
睡外莫聽泥活活
想中已睹麥含含
明朝竹徑添幽事
玉板堂頭作小叅

舍弟既到有作

武陵倉卒記他時
我獨南翔子北飛
覲過幾多歸後事
相看仍是別時衣
匪躬老矣惟心在
便腹依然但髮稀
尚有苦吟三十載
與君同飽蜀山薇

收景初貶所寄

信斷常懷信斷憂得書還有得書愁未應宿業都相似
總為謔聲不肖休見說宵中卷雲夢莫將皮裹貯陽秋
而翁有道知興廢不患無詞詣播州

次句景山見寄韻

此生正坐不知天豈有絺琴解引年但覺轉喉都是諱
就令搖尾有誰憐腰金已付兒曹佩心印還當我輩傳
他日乘車來問道葦間相顧共延緣

夜聞蛩戶叩船作長江礪欣然樂之殊覺有起予

之興因念涪上所作招漁父詞非是更作此詩
反之示舍弟端孺

當年無奈氣狂何醉檄涪翁棄短蓑
晚落炎州磨歲月欲從諸蜚丐烟波與君共作長江礪
况我能為南海歌身世卽今良可見不應老子尚婆娑

北風累日不止寒甚寄鄭潮陽

山前臘雪想紛紛風到南訛盡處村翁面不容存酒子
牀頭幾欲爨桐孫園林呼舞知衰怯牕戶奔馳覺眩昏

咫尺潮陽五袴國可能分我一襦溫

即事

歸心急似瀧頭水華髮多于嶺上梅正是堯朝猶落此
當時湘浦亦宜哉

還家久近書難寫破屋陰晴榻屢移吾道非邪來曠野
人生樂爾復何時

案頭行掃塵隨起牕眼纔封雨又稍更力窮空沽白餅
莫將疲茶鬪黃茅

遣興

僧寺借經便大字鄰牆喚酒及新篇
三年于此得其理一飽已還非所求

酒經自得非多學詩律傷嚴近寡恩
田里歌呼無籍在朝廷議論有司存

春日謫居書事

四十緇成素清明綠勝紅形容千慮後
門館一貧中白日時時別青蕪處處同
此生唇舌裏啼鳥莫春風

大觀四年春吾與友人任景初舍弟端孺自蜀來
京師至長安時方寒食吾三人相與戎服遊九
龍池飲酒賦詩樂甚是歲吾遷嶺表明年景初
亦謫江左忽忽數歲皆未得去寒食無幾念之
悽然作詩寄任因命舍弟同賦

居今行古任定祖底事遷延亦未歸我坐力田傷地脈
君緣搜句漏天機故都回首三寒食新歲經心兩褐衣
學道一生凡幾化不因到此始知非

乙未正月丁丑與舍弟棹小舟窮西溪至愁絕處
度不可進乃歸溪側有兩榕甚奇清陰可庇數
十榻水東老人常飲酒其下云

楊梅溪上柳初黃
荆竹岡頭日正長
獨木小舟輕似紙
一尊促席穩于牀
樹從坡去無人識
水出山來帶藥香
應有居民解秦語
為言昭代好還鄉

有感示舍弟端孺

一出潼關五見梅
愚忠幾欲伴黃埃
弟兄手足窮孤竹

母子肝腸泣老萊好語忽從天上落行人直向一作海邊回此生報國無他事力穡供輸莫待催

長沙竹笋聞于天下大者可十餘斤食之甚甘而不冰脾昔渡湘欲作詩未暇也今日復過之乃酬以此篇

地入長沙莫歎卑竹萌徑尺舊相知九重纔復金門籍萬里先參玉版師契濶累年真負口徘徊彌月未妨脾渭川風味那能對中有離騷九辯辭

雜詩

屏跡舍人巷灌園居士橋
花開不旋踵草薶復齊腰
蛤哭明朝雨鷄鳴闇夜潮
未能全獨樂鄰里去還邀

已絕經年筆仍開盡日門
身謀嗟翠羽人事歎榕根
蔬食風掀市樓居水破村
嶺南霜日薄何得髻邊繁

便歸良不惡未去且隨緣
戶口知無瘴謳歌覺有年
藤牋得句後桂酒抱愁邊
經術吾衰矣猶堪舉力田

不死良難學全生或可幾
茶隨東客到藥附廣船歸
棹

倦收成敗書慵卷是非關心無雜慮魂夢入精微

兀坐旦如此出門安所之手香柑熟後髮脫草枯時精力看書覺情懷舉盞知炎州無過雁二子在天涯

飽食為茶地深耕覓酒材翻泥逢暗笋汲井得飛梅湖盡船頭轉山窮屐齒回田間良自苦清興亦悠哉

壯歲日千里晚途天一方花縵聊傲世白袷亦隨鄉團扇侵時令方書遣晝長此間吾所樂便擬卜林塘

雜興

白日消諸妄青山對屢空著書防惡客學圃問鄰翁織
貝流肌滑櫝榔入頰紅丹砂落吾手秋至任飄蓬

多事定何補寡言聊自溫蟹黃嗔止酒雞白勸加食濯
足樓船岸高歌抱朴村愧無魑可禦只益負君恩

闊窄良難入閒寬足見容竹根收白疊謂竹布木杪得黃

封謂椰酒問學兼儒釋交遊半士農行歌村落晚落日滿

攜筇為農沙子步附保水西鄉隱几江天遠開門佛土

香時情荒徑草埜色淡一作淨漁梁欲縱高秋目東偏短

作牆

舊物杯中酒新銜海上翁百非無一是顯過豈微功引
水江分碧烹丹井為紅幽居亦多事度日不全空

小市江分破連萍水卷翻到今佛跡在千古鶴峰尊浮
嶠來何處豐湖入數村登臨有何好秋至數消魂

已分詩驅使寧辭酒過差南烹人釣蛤北信客占鴉年
事侵膚理憂端宿肺家向來功業興到晚詠餘霞

覆載宜然等寒暄乃爾殊雪曾前歲有地過此邦無煮

海鯨鯢動烹山虎豹呼南來何所得詩語帶陬隅

夜語不覺久晨興良獨難加之得卯酒晚矣恰朝食笋
蕨春生箸魚蝦海入盤南方禁太飽茗椀直須寬

海氣東南上野烟申酉間草平連別洞雨轉入他山道
路魚鹽去樵蘇竹木還西江并北客相對各蒼顏

水過魚村濕沙寬牧地平片雲明外暗斜日雨邊晴山
轉秋光曲川長暝色橫瘴鄉人自樂耕釣各浮生

浪迹蒼梧外放懷黃木東人情雙鬢雪天色屢頭風國

計中宵切家書隔歲通為儒得愁思一笑賴兒童
萬里非吾土三年失我常只愁鷺跼跼敢作鶴昂昂
竹連閩越黃雲入夜郎何時返栖息誰為問桃娘

閒居

未許幽人曉夢長朝朝親炷佛前香有詩為愛袁家酒
無病緣抄陸氏方身雜蜚中誰是我食除蛇外總隨鄉
白沙翠竹門前路疑出西郊向草堂

細細敲門細細應老翁方曲畫眠肱魚陂舊種千頭鱸

桑徑新窠十畝繒菜足尚堪分地主米餘翻欲供鄰僧
平生雅有乘桴興咫尺滄溟去未能

聞勾景山補蓋屋丞仍聞學道有得以詩調之發

萬里一笑

人言蓋屋似江湖莫對丞哉歎負余別後耳根無正始
向來紙尾得黃初可憐鬼谷縱橫口今讀神溪縹緲書
臣朔許長錢許少何當天子念公車

遣興

八千岐路愁何補四十光陰老亦宜此去只看犀首飲
向來都是虎頭痴逢時有道其如命得意無言所恨遲
詩債即今渾倚閣新篇惟有莫相疑

春歸

東風定何物所至輒蒼然小市花間合孤城柳外圓禽
聲犯寒食江色帶新年無計駟愁得還推到酒邊

鄭太玉送子魚

便當權閣太常齋藥竈于傷手自煨須信子魚藏妙理

坐令母蟹媿凡才，刀頭定向何時得。
劒脊頻將好意來，老去少陵雖病肺。
尚堪持此薦寒醅。

江漲

秋來雨似澆，雨罷水如潮。
市改依高岸，津喧救斷橋。
雲陰哭鵠婦，池溢走魚苗。
天意良難測，前時旱欲焦。

代書寄鄭二

別後定何似，此中難具陳。
倦憎秋氣濕，老怯曉烟辛。
沸議今方爾，歸期覺愈伸。
須煩三絕手，時復餉清新。

夜久睡覺不復能寐凄然有感

無復更殘暑夜深清欲飢葉飛魂夢數露重語音知月
色到秋苦更聲臨曉遲平生憎墨翟老去亦悲絲

立冬後作

啗蔗入佳境冬來幽興長瘴鄉得好語昨夜有飛霜籬
下重陽在醕中小至香西鄰蕉向熟時致一梳黃

端孺糴米龍川得粳糯數十斛以歸作詩調之

倒拔孤舟入瘴烟歸來百斛瀉豐年炊香未數神江白

名米

釀滑偏宜佛跡泉飽去定知頻夢與醉中何至便妨

禪憑君為比長安米看直公車牘幾千

漫成

雲暗便牕破山寒賴屋低往還天外少早晏雨中迷書
冊開仍闔履聲東復西何常有所賦得句旋安題

聞鄭二對吏五羊

舊友年來略散亡新收鄭子亦遑遑歲云暮矣無雙雁
我所思兮在五羊獄吏事權先自貴書生蹤跡况能狂

風流人物今餘幾何忍羣兒復謫傷

東麓

經旬不見小羌廬忽爾相逢喜欲呼自入秋來更韶潤
却從瘦裏帶數腴人間信有傷心碧坐上那無滿眼沽
可是清暉解娛客能令腸斷到愚儒

野望

賴有澄江在專供倚杖清水裁偏岸直雲截亂山平鞞
鼓知農隙雞豚覺歲成却緣搖落後木杪得孤城

獨遊

是日遊予獨幽情知者誰時光新舊歲節物淺深枝鴉
攬春詞敏鶯窺野燒痴田園有妙理吾悔得之遲

醉眠

山靜似大古日長如小年餘花猶可醉好鳥不妨眠世
味門常掩時光簾已便夢中頻得句拈筆又忘筌

重陽後二日從無盡泛舟遊處士臺故詩人秦龜

從所居

阜河經雨水微沙船帖臺根日未斜三徑就荒悲白土
一樽相屬對黃花已將遠眺收平楚更遣清言到永嘉
要見仙翁頭似漆請看醉後落烏紗

生還至宜都逢李六

更把餘年著酒澆莫談前事費燈挑地緣有語封還止
印為無功鑄復銷賴是詩書能却瘴到今魂夢亦聞潮
頭西歸去君休怪尾段無多不奈焦

將赴闕有感示聃

老畏高門地慵便下澤車終然嬰世網難作愛吾盧白
首趨行在青袍奉起居平生誇好手到此不知疏

次韻幼安畱別

白頭重踏軟紅塵獨立鵷行覺異倫往事已空誰故舊
好詩乍見且嘗新細思寂寂門羅雀猶勝累累塚卧麟
力請宮祠如意否漸謀歸老錦江墳

宋詩鈔卷四十六

欽定四庫全書

宋詩鈔卷四十七

內閣中書舍人吳之振編

孫覲鴻慶集鈔

孫覲字仲益嘗提舉鴻慶宮故自號鴻慶居士五歲時即為東坡所器第政和間進士靖康倣擾為執法為詞臣旋由瑣闥歷吏戶長貳連守大邦紹興而後遭值口語斥居象郡久之歸隱太湖二十餘年孝宗

朝命編類蔡京王黼等事實上之史官年九十餘卒
由其居閒久故問學深誠有宋之作家也獨以其誌
万侯禹之墓嘉靖間常州欲刻鴻慶集邑人徐問曰
覲有罪名教其集不當行世遂止嗚呼斯言固秋霜
也今不廢其詩者以見有詩如此而不得列于作者
欲立言者知所自重耳

湖州天寧寺飲王生二首

莫鬪蝸兩角且共貉一丘夷踞坐我旁汝豈河南騶割

肉一啜之徐以大白浮噲伍君勿譙笑談起封侯
諸家迹便掃得此一老兵江東醉司馬酒中尚求名哀
哉南山箕不平自號鳴慎勿歌烏烏作此老婢聲

富陽道中二首

渺渺行雲慢慢溶溶曳水衣雷翻巢墮乳風落網粘飛獨
拄青藜杖來推白版扉平生丘壑趣漂泊寸心違

白帽炎州客青裙酒姥家微風搖扇浪細雨落簷花客
舍休占鵬蠃村欲饌蛇會令醒復醉高枕送生涯

蘭溪津亭病起

風波湧地千漚發，創痛鑽皮百箭攻。
藥裏關心防二豎，書盈篋忤三蟲。
剖瓜女隸方祈巧，結柳奴星也送窮。
笑我平生持螯手，未應咄咄左書空。

三衢聞都督兵潰常潤間懷舍弟而作

紫荆有信欲開花，黃犬無情不到家。
偶坐厭聞烏嚶嚶，杯行喜聽鵲查查。
同看明月人千里，相望孤雲海一涯。
驥子熊兒無恙否，風雲慘澹鬪龍蛇。

疎山寺次白文林韻二首

藜杖怱怱集晚林，長廊破壁撼鐘音。
天涯流落相逢地，杯酒殷勤莫厭深。
萬里功名飛燕領，千金博飲角牛心。
更聞好句驚人倒，一洗蠻烟瘴霧侵。

黃花翠竹小叢林，卧聽南山白石音。
螳鬪已空遺堦在，蝸跼終戀故廬深。
掀髯一笑追前謬，禮足同參看此心。
且向疎山結香火，人生莫受二毛侵。

明水寺五代末危全諷據臨川時所建畫像至今

存焉寺有最高峰有祠屋一區道士居之

臺殿何年有千巖紫翠間金僊佛世界羽客道家山骨
朽餘三窟皮存尚一班傷心千古淚相伴雨潺潺

崇仁縣

萬山攢擁天一笠北風吹雨兩鬢濕飢鳥絕叫護巢飛
老蛟怒起挈雲立孤城短日砧杵急騎驢渺渺衝泥入
桑枝倒折機杼空道有廢井無人汲遺民到今傳舊邑
擊水華鯨浪三級故物漂流首戰餘客子起坐萬感集

小驛香醪如雪汁一杯快作長虹吸酒醒寂歷照短檠

幽咽數聲鄰婦泣

縣人喜親渡
亂後如故

遣興

亂後煎百慮老去無一欣故人尺書至好語中夜聞坐
久百蟲絕開簾月紛紛長歌侑一醉酒醒擊空尊

山行憩田舍老父出迎以黃甘白酒為餉

藜杖扶來雪滿髯諄諄語好意深深酒傾白墮杯行玉
橘破黃苞坐飮金醉起莫辭田父肘甘餘須識野人心

匆匆不盡板畱意挽袖丁寧更一臨

兩日復往次前韻

寒蔬離離銀線亂

臨川出蔬號銀條

凍醴黯黯玉井深坐蔭庭

松翹翠蓋行穿野菊布黃金犬迎客入喜見尾鵲隨人語欣會心俗裏淹畱怕轅釜驅兒招喚得重臨

明水達老以黃甘荔子土芋為餉小詩答謝

客居莽牢落幽絕無四鄰歲窮有衣結日晏猶甑塵偏仄戎馬間敢厭薪水勤故人情義重采采青泥芹小摘

持寄遠分餘為情親丹荔擘輕圓黃甘破芳辛蹲鴟勸
加食風味亦可人渺渺山澗曲浩浩水雲晨踞爐有前
諾兩翁對然薪眼顚眩紅綠共此無邊春

次韻王子欽立春

歲晚驚呼身已老天涯流落首空回便將酒力推愁去
且放春光入眼來人語嘻嘻爭鬪草宮花閃閃豔粧梅
雪消水暖春江動綠漲蒲萄萬斛醅

遊東塔雨中夜歸

山色凌寒春尚瘦
潭影涵空清可漱
漠漠雲行紫翠間
斑斑雨濕黃昏後
火炬穿林鳥出巢
人語闌門狗窺竇
杖藜有興會重來
更待黃鸝弄晴晝

清明日與范李實諸人過胥澤民別墅小集

水滿雙飛白鷺花
深百轉黃鸝寒食
清明過了一川烟
草離離

兀兀三杯卯困昏昏一枕春融
酒醒落花風裏夢回啼
鳥聲中

曹山絕句

毀瓦區區為食謀
半生炊黍在刀頭
一塵會入扶犁手
不上陳登百尺樓

題妙覺寺壁

葉底紅稀不見花
枝頭綠暗可藏鴉
春歸古殿蒼苔滿
一點籠燈隱絳紗

再至

老眼逢春病有花
淋浪醉墨字如鴉
懸知不是唐王播

慙愧高僧護碧紗

宿妙覺竹菴贈靜老

青山映落日澹澹烟中明出門無所投曳杖隨意行破
衲僧兩三喜笑爭邀迎曾巢俯修行飛星動高覺老人
如宿昔真契同三生遇人無戚疎出語惡不情寥寥風
馬牛肝膽欲盡傾怪我胸中山硤兀尚不平邯鄲樂無
度短夢一餉榮靈觸怒不休暴骨千里橫微言起我病
內愧面汗駢蚤知天宇大豈有世網嬰舉扇障西風浣

此滄浪纓

別如老

同舟無胡越四海皆弟兄吾人雖晚接一笑蓋已傾世
亂識真態途窮見真情曳杖扣禪扃撞鐘聽蹕鳴小牕
風雨夜對此二榻橫吾身如木偶春至不復榮豈無三
宿戀天雨方流行去去得首丘歸田克踐更

徙寓妙覺佛舍胥又民襖被相過賦夜坐

客居厭窮獨蓬艾翳環堵莊舄尚越吟鍾儀猶楚語吾

人有奇操空洞見城府相逢逆旅中霧豹初一睹拘囹
賦囚山避謫憎市虎褰裳肯過我崖嶠走風雨微吟對
清夜破此五月暑墜露沁金莖空花墮犀塵孤燈映籠
紗冷豔翳復吐耿耿遂不眠逢逢聽晨鼓

次韻王子欽

二年客塵土獨夜憂悄悄遇酒一破顏歌呼醉連曉寸
心為誰明伴此孤月皎枯枿鬱崢嶸老幹空自表蟻穿
萬孔萃蛛挂千絲擾白鵲逝不來豈敢更擇鳥

熊夫人遣介欲壻澤民小詩戲之

牆頭鄰女三年望戶外文君一笑窺
欲得賢夫嫁張耳此真佳壻是羲之
定知不折飛梭齒似說先齋舉案眉
不信侯門深似海水流紅葉漫題詩

靜老通幽軒

諸峰倚崔嵬衆壑隱犇峭寓目欣有擊
會心領其要開廬結茆竹代翳軒蓬
蘢此君亦可人玉立盡娟妙風酣翠
相倚月吐清自照窈眇非世音鸞鵲
中夜嘯烟塵閤

北關烽火被南徼便欲老三閭終焉隱屠釣

秋夜二首

山寒藹暝姿楓老帶漲痕蘭摧桂亦折往往歸其根萬
籟各收聲一氣中自存鼻斤無可斲尻駕不復奔孤光
照獨夜月落低金盆

寥寥犬吠村微月耿黃昏鷄豚市井空虎豹窟宅尊元
龍百尺樓獨帥誰與論酒聖且復

闕

魔自驚奔彈缺

歸去來稚子侯柴門

自崇仁趨新淦凡四夕迺至一寓道觀三止僧舍皆
畱一夕而去賦小詩記之

妓原寺

稚子簷門立老僧迎客入湛湛玉甃寒唧唧銅餅泣小
軒風雨過牕戶青紅濕晚花發秋妍黃蜂正衙集

化度寺

失路迷千嶂投休借一枝扣門竹西寺立馬日斜時
雙鑠僧窺戶睂盱犬透籬定知嫌不速明日與君辭

栖霞觀觀在麻嶺之下

雲表朝飛屐松殘晚駐鞍
破扉聯白版稿頂繫黃冠
徑雨喧風籜汀沙立露翰
小牕牀坐好對此百憂寬

三山寺二首

斜日半牕明無人獨掩扃
風鈴時自語雪柏老終青
立鵲參差見微泉斷續聽
老僧渾不語危坐卷殘經

異縣久為客窮途飽所更
對牀雲伴宿曳杖月同行
到處身如寄看山眼斂明
平生飲中趣酒賤且頻傾

再和何襲明

沙平雪漫水涵空路入千巖紫翠中
村遠微明漁舍火樓高斜矗酒旗風
可憐方外狂司馬來伴田中一禿翁
南北相望三十載心期不改斷金同

何嘉會寺丞嫁遣侍兒襲明有詩次韻

魯陽之戈倚半空誰能一卻日再中
驚回十二巫山雨水隔三千弱水風
瘦語尚傳黃絹婦

嘉會侍兒以妙為名

多情好

在紫髯翁謫仙尚有杯中月獨舞婆娑醉影同

迎薰堂小集襲明用前韻再和

飲痛瓊艘百柁空參橫斗挂月當中不愁馬上衣沾露
且看樽前憤墮風未辦清歌娛醉客莫將強韻壓衰翁
悲歡冷淡君應笑注瓦傾銀一體同

長樂寺

嘉會常置酒
錢歌姬於此

萬瓦冠松壁千嶂鎖雲莊故人置酒地清夜燈燭張破
壁挂月闕遺笙嘯風廊妖歌傾四座醉臥錦瑟傷寂寂
花絮亂忽忽鷺燕忙雍門已陳迹餘音空繞梁我來久

徘徊驚呼首一昂老僧獨依然坐對栢子香

志新遣兩介致書餽以巴源紙黃甘珠欖大栗鶯
鮓胎蝦為餉戲作長句

巴江新擣萬穀皮褚生粉面膚凝脂故人千里特寄我
落筆宛宛天投霓綈囊丹果十襲包爆栗飛燼石火敲
紅鹽著樹落青子香霧喫手披黃芭蒼鶯無罪見菹醢
苦酒濯之光五采蝦蚶久已成枯腊只尺波濤渺江海
客舍爭席紛滿前饋羹不復五漿先殷勤重餉有吾子

兩夫荷擔頽其肩

蜀婦新寡從何純中讀左氏戲呈純中

麟經束高閣掩卷有三歎朱絃久零落鸞膠續其斷英
英左阿君獨唱音節緩故是我輩人吹簫得幽伴先生
擁絳紗弟子褰素幔一揮斬鼻斤便舉齊眉案

宜黃尉李集義遣書問安否小詩為謝

三年著南冠兩見芳歲新朝為蟲蛇侶暮與魑魅鄰行
隨木上坐卧對竹夫人獨有金石交不廢風雨晨書來

一弔屈我已屢厄陳嘖嘖爨下桐嗷嗷轍中鱗絙以朱
絲繩放之碧海津窮途得重惠肝膽大輪囷

題破江蕭氏菴二首

雪屋清如洗雲崖翠作堆破扉風自掩敗壁雨先頽野
色初還柳林香尚有梅滄江千萬頃一鳥鏡中回

雲逐歸心亂山隨望眼賒疎林歛晚照淺溜咽春沙客
路三年過僧牕一笑譁此生安稅駕有地即為家

宿善法寺再賦二首

水繞禪牕淨香凝古殿深讀書不求解酌古聊自斟塔
鈴已無語匣琴猶有心獨謠西閣夜風滿快哉襟

愛竹門可欵命車壑初尋鳥啼春院靜人語夜深鼠

迹畱僧鉢蝸涎浣佛金鄰翁笑相命春酌夜沈沈

田雲朔從

政置酒

再過天長寺

山立起平案松偃卧枕岡尚憐桃靨小已見麥頭昂檢
事關兵氣逃禪入醉鄉平生湖海興一棹付慈航

分宜道中

老牯挽犁泥沒膝，剡剡青秧鉞水出。
大麥登場小麥黃，桑柘葉大蠶滿筐。
猿鳥初呼聚，儔侶繅絲百箔聞好語。
此時物色不可孤，勸君沽酒提壺蘆。

礪巖寺

千松夾道直一水，抱村流青絕小叢。
林繞舍竹修修老僧慣見客，壞衲雪滿頭。
野果拆奇苞，畦蔬翦新柔。漂零五管去，邂逅一笑畱。
詩成寫君壁，記此夢中遊。

靈泉寺

牕戶遙開紫翠間，小橋獨立聽潺潺。
意諸獨有清風共，興盡聊隨落照還。
但見虛童蒙白帔，且無瀧吏發驂顏。
風花雨葉元無定，何必區區戀故山。

嶺外虛市市人大半以白帔蒙首

七星巖

十載汙修門，簪橐侍帝垣。
五雲深莫窺衆星拱，以繁一坐牘。
背書身落梅上村，山川發餘想。
鍾鼓眩昔聞，星圖煥斗極。
兩兩錯地文，今日復何日。
乘槎造天閭，日月起。

可挾參井立能捫誰當揭其柄為我酌瀛尊

龍隱巖

跳波觸石喧古木抱崖擁老蛟厭泥蟠一笑作潭洞孤
峰起峭崿哀壑浩呼洶腥風噤蛙淫凍雨落毛氄凜凜
白晝寒瘴髮立盡聳旱氣曛日黃縮爪但陰拱悠然四
大海斂此一毛孔安得化為霖蔥葉有光寵

時禱雨
未應

西山超然亭

厖區翳榛莽地瘴藏百怪西山何軒軒拔脚風塵外中

縈一線蟠側立兩壁對劬連九疑高遠控三相大孤亭
坐林杪俯見飛鳥背號方泣二女禦魅竄四罪誰去窘
囚拘故自脫天械飄飄思凌雲萬里風雨會

飲修仁茶

煙雲吐長崖風雨暗古縣竹與蘋兩肩弛擔息微倦茗
飲初一嘗老父有芹獻幽姿絕媚嫵著齒得瞑眩昏昏
嗜睡翁喚起風洒面亦有不平心盡從毛空散

事見廬
同茶詩

九日次獻花鋪

李衛公貶海外道過
象江蠻女獻花於此

古路三叉口青裙兩髻了更無陶令菊空想衛公花破
屋堆黃葉清江綠白沙殷勤邀一醉蠶酒壓梨楂

到象州寓行衙太守陳容德攜酒見過

飮坐黃甘喫手香堆盤丹荔照人光莫辭蠶酒一尊赤
會壓瘴茅千里黃未省讒言遭薏苡直將空腹傲檳榔
酒醒夢覺知何處樹影參差月滿廊

南山寺

千丈雲根蔭此邦沈沈寒影卧秋江潭空映日蒼虬動

烟暖翹沙白鷺雙夢覺難聲喧客枕吟餘竹色滿僧牕
詩成絕叫曾樓上聽我洪鐘萬石撞

安心是藥本非禪遇勝欣隨意所便嚼蕊拈花身老矣
穿雲涉水思茫然行逢酒伴操觚去倦憩僧牕借榻眠
寄語排言問津者人中今是地行仙

別象州陳守容德

三年客殊方榮悴不堪說迢迢家萬里奄奄命一髮使
君古大夫興衰在縲紲平生風馬牛舊職比鵜蜃欣然

一笑祭破此百憂結皇恩下天扉淚泣孤臣血行厨洗
玉盤載酒助歡悅庖珍問五鯖餅字炊十裂徙突今未
黔班草尺一訣何須更秉燭端是夢中別

雉山寺青羅閣

蠻村避諱三年過野寺尋僧半日閒小檻吹香花漠漠
斷崖漱碧水潺潺桺榔葉底秋聲滿柏子烟中午夢還
便擬買舟隨釣叟一蓑烟雨繫滄灣

蒙亭二首

小築三間足雄包萬象并遙波通極浦落日抱孤城小
語千巖應長歌百蟄驚坐看衣屨衣漠漠晚雲生
落拓詩酒伴疎慵粥飯僧盞胃開遠抱拄頰見高稜鳥
倦猶聞語蛟寒正可噉一區如可卜吾不愧陳登

發桂林劉帥立道同諸司出餞於甘棠渡口二首
行盡海北天笑指湘南路使君載酒醪擁節東城駐前
驅千幟直縱獵萬人呼塵流翳白日十里映黃霧何人
搆迎我一輦橫江渡渺渺倦鴉翻相隨歸薄暮

洶洶號萬竅颼風吹海渾冥冥蔽一天瘴雲埋日昏南
荒底日所黃輦三家村誰云花解笑但有鳥能言繆恩
解南冠歸路首北轅酒行可以起稚子候柴門

北歸過永永守趙君宰置酒萬石亭

三湘陌上逐臣歸萬石亭中送客時拄杖披榛行莽蒼
汲泉磨蘚看魁奇天傾五色遺媧補谷變千年出峴碑
何似蹊邊小桃李向人膏面出風姿

宜春臺呈太守陳次明

聞說宜春好曾臺試一登
隴泉悲瑟瑟松雪見層層
孤絕烟中寺微茫樹下僧
詩工傳寫妙不數畫師能

再過曹山示如老

不羨鵬南運聊隨雁北還
捫天上何嶺犯雪過曹山
偶列萬里去重來一夢間
觀河見如舊雙鬢自攔斑

曹山在河

嶺之下

送智海上人二首

大師興趣在江湖拄杖扶行穩
當車苦要詩翁淡生活

穿雲涉水到西徐

折鼎支磚日半欹
拾薪乞米為朝飢
昏昏一點炊烟裏
見我邯鄲夢覺時

馬跡上冢遇大風雨書僧壁二首

松竹騷騷繞舍鳴
沙頭一夜雨連明
衝泥裹飯洗新冢
夜哭干霄共一聲

白恰排肩上冢歸
飢烏攫肉紙錢飛
東家已改清明火
一點炊烟上翠微

讀沈德潤詩卷

時沈寓
金沙寺

繫馬門前柳投鞭息吾駕青林合扶疎木杪抗風榭沈
郎天骨清衆壘立嵩華閉閣卧讀書一榻過僧夏尤工
五字律句法窺鮑謝無窮真炙輠有味乃食蔗我老復
何為齒髮日夜化寅緣葦間見拊髀起一宅懸知擲地
響自欲補天罅坐令長安紙頓起千金價

望道場山塔

碧玉旋螺插暮烟遙看桂子落僧前試尋白水田頭路

一葦橫江浪接天

蕭寺知名四十年身投籠檻到無緣
行人指點松間路正在孤雲落照邊

橫山堂

波間指點見青紅雪脊嵒稜倚半空
幻出生綃三萬幅游人渾在畫圖中

蒼雲十畝蔭平寬露葉風枝繞舍寒
莫遣先生賦歸去且令小吏報平安

題谷隱

碧瘦幾千疊清深漲一篙紅輕花似肉綠細柳如綵句
好無強對神起有獨遨葦間青蘋笠髻見秦逃

送徑山僧

桑棗翳一丘風雨鳴四壁晨門響丁丁一笑喜折屐臞
仙詩作瘦句有徑山色哀彈發朱弦妙寄追白石虛名
子過聽愧卧不能夕歸袖挽莫留凌空看飛錫

華亭朱師實中大燕超堂

海禺納萬艘市區沸百賈黃塵翳白日千騎騰一鼓蚊
巢十字路四顧盡曠土蝸角兩大國一怒有標杵角名
眩多盧聚訟攻衆楚昏氣自成霧濯濯汗浹雨朱公誤
涉世吏隱寄圭組俗緣墮人境心大接天宇塞芳採蓮
舟擷秀莢藥圃山寒石稜紫樹老松鬣古風牽碧羅巷
雨壓翠纛舞寧須鳥催酤自有花解語觀魚樂洋洋夢
蝶飛栩栩坐令游俠窟化作仙佛土高卧水國秋靜憩
月庭午不假壺公龍天上有官府

洞庭善慶堂置酒小詩寄之

幽絕小蓬壺參差見畫圖
亂青山四出一碧水平鋪
洲葉紅相照沙茸細欲無
蓮房駢百子橘圃聚千奴
布穀休催種提壺且勸酤
楚腰飛燕燕秦缶和烏烏
便旋驚回雪連娟引貫珠
西風催畫鷁落日詠驪駒
浩蕩川原隔驚呼歲月徂
寥寥清夜夢直提控搏扶

興化朱公大卿沒於庚申歲既除喪矣其子彥實
過余於晉陵畱十日而別賦小詩以餞之

柴扉忽枉故人車
躡履歡迎一笑初
夢裏覆蕉疑有鹿
食前彈缺歎無魚
忽忽注瓦澆村釀
草草供盤折野蔬
他日死生君一訪
上林鴻雁有書無

多寶院

穿雲訪幽伴倚杖蒼崖根
冥冥篁竹中古寺松為門
野僧營一飽乞食山下村
擁鼻且獨謠未覺釣石溫
世事風雨過歲陰波浪奔
飄然得遠遊寄此五石尊

甘陂莊院

張公卧江海戢羽如鵬蹲平生廊廟具投老三家村一
壑身所寄萬里心自存買花紅間坐種竹青滿門似聞
橘生奴漸見桐有孫提壺時見招一笑空壘尊

寄題莫謙仲山居

魚鹽市井雷冠蓋車馬路生息自相吹晨門默如霧超
然塵外躅肆兀見砥柱湯湯海橫流自有安立處幻泡
水上漚空華草頭露一峰獨蒼然歲寒但如故醉拳庭
下花吟繞池邊樹便有山中臞來隨白雲屨

過慧山方丈碑老酌泉試茶賦兩詩遺之

蕭蕭呵蘭若桑苧有故家佛屋倚高寒僧蹊抱欹斜殷
勤泉上客流落瘴海涯蜚酒壓梨楂蠻烹啗龜蛇光潔
鏡一奩照影空自嗟老僧薦茗粥芳鮮疑露華驅除鼻
中雷掃盡眼界花飄飄思凌雲攝身上蒼霞

過楓橋寺示遷老三首

白首重來一夢中青山不改舊時容鳥啼月落橋邊寺
欹枕猶聞半夜鐘

三年瘴海卧炎霄夢隔青楓一水遙
萬里歸來悲故物
銅駝埋沒草齊腰

翠木蒼藤一兩家門依古柳抱谿斜
古城流水參差是
不見玄都舊日花

吳門道中

數間茅屋水邊村楊柳依依綠映門
渡口喚船人猶立

一蓑烟雨濕黃昏

一點炊烟竹裏村人家深閉雨中門
數聲好鳥不知處

千丈藤蘿古木昏

晝畫谿行四首

老牯浮鼻水中歸
綠雉應媒桑下飛
蘿蔦冥冥山四起
數家雞犬烟樹裏
一支新綠漲晴溝
楊柳中間擊小舟
晝畫谿頭鳥鳥樂
呼風喚雨不能休

蝶趁花飛爭入坐
倚空百尺游絲墮
亂山銜日半船明
斷雲載雨前村過
蕨芽戴土小兒拳
漁市人歸柳貫鮮
晝畫谿頭人語好
烹魚煮蕨餉春田

沙頭綠暗已藏鴉竹裏猶殘一兩花
蝸廬抱柳開新國
燕語窺簾憶舊家
春風有信自年年
罨畫谿邊柳繫船
陶情滿滿酒如泉
醉與長齏藉草眠

翠木蒼藤繚白沙
槿籬茅店野人家
了無狡兔營三窟
只有黃蜂趁兩衙
樹頭獵獵酒旗風
菴裏賣酒翁
銀餅快瀉清若空
令君一笑面生紅

龜潭二首

稚竹緣崖瘦蒼藤翳樹昏
野花渾少態谷鳥自忘言
獨

曳烟中策來傾月下尊樂哉無與共幽興在桑門
蝸舍三間小龜泉一勺甘楞巖渾不看彌勒久同龕潭
影千峰倒雲稍萬木參巖花自無主紅雨落氤氳

題董令升待制明谿

先生谿上宅華榜有殊稱已為山作主更與谿為朋高
甍俯流水坐見南山稜濯髮雲破碎湔衣雪崩騰老蟾
駕月來潏潏一鏡升舉櫂擊空明玉壺響春冰夜久羣
動息一嘯清風興手持修月斧自控赤鯉乘

李茂嘉寄茶

蜜珍分到謫仙家
斷壁殘璋裹絳紗
擬把金釵候湯眼
不將白玉伴脂麻

春事

茆棟依林出松扉
倚水斜浮蒼圍百疊亂
綠翳三叉屋
破蝸書壁庭蕪鶴印沙
小桃供一笑已著兩三花
黃鸝遺好音碧草縈別恨
雨擢翠千尋風斂紅一寸持
醪散百憂琢句破孤悶
呼童數擊鮮無久諸郎溷

游金沙寺寺有陸希聲侍郎讀書堂在頤山上

一龕明滅佛前燈
破滅猶殘一兩僧
說似鴻盤讀書處
試尋幽伴拄烏藤

綠筍遺苞半出籬
清谿一曲翠相迷
古苔稱意壞牆滿
好鳥盡情深樹啼

歲暮郊行

殘雪溶溶水波凍
山空翠濕衣巾重
東家西家酒初熟
南枝北枝春欲動
班坐偶隨鷗鷺集
意行適與牛羊共

直將萬事付狙公莫浪歡喜踏破甕

臞菴浮天閣

黃蘆吹雪滿汀洲萬里烟波按素秋數點征帆天上落
一輪斜日水中流長橋踏月隨幽伴小閣浮天賦遠遊
便買一舟為泛宅此生何必老菟裘

向伯恭侍郎致政薌林築一堂名之曰企疎晉陵

孫_某聞而賦詩

銅臭應作么夢屍當得官喁喁魚聚沫戢戢蚶集酸高

人有遠抱一笑視鼠肝水將洗耳用山作拄頰看種芳
茹秋菊寒秀紉春蘭披披芰荷衣采采首蓿盤三徑
真境一瓢非世歡富貴挽不來為我歌考槃

且學方回癡莫羨董公健誰合軀七尺浪作青紫椀更
搖乞憐尾仍出弔喪面薌林有老僊蚤具佛眼見國恩
儻麤酬已責遂焚券驅除竹馬棄狼籍芻狗踐寥寥漢
二傳千歲一闕健竟日飲無何更補離騷傳

湖汭上冢繫舟丁山田舍小憩

清谿三百曲一片春風綠
茆屋有人家窈窕閑深竹
老去耽田里寓目快新矚
風漪卷翠綃雲巘鏤蒼玉
尋盟喚白鷗解佩贖黃犢
獨嘯無一人傳聲滿空谷

妙光菴

孤烟抱水村落日滿雲樹
亂山如連環楊柳是門處
青繚竹谿灣翠點苔石路
鍾魚寂無聲白石掩僧戶
茗盃酌雲腴香篆擢烟縷
坐穩不知夕炯炯山月吐

吳漢逸家荆谿蓄古書奇器甚富余欲造觀而未

果賦小詩先之

高人臥江海烟雨三家村白眼僧俗徒青山自當門披
圖望千載耿耿尚自存金鑄腰褭蹄漆書科斗文虬螭
盤六印犧象刻四尊劒色虎皮斑琴漫蛇腹紋猶吐星
芒寒尚帶雷斧痕我亦望古者昂昂真戴盆儻未倚門
揮應許置榻論從公問奇字載酒過子雲

寄題四明吳總拙軒

分寸躋攀曳九牛一錐無地拙於鳩穿鍼結縷非吾事

不上天孫乞巧樓

老罷誰當問喘牛羈栖且作寄巢鳩
葢茆一把藏吾拙便是元龍百尺樓

雨

山空發清響樓迥落餘飛掩丹花頭重渾酣水面肥喧
塵沈地鏡飄灑淨垣衣數點蒼茫裏飢鳥接翅歸

小園春事

屋頭喚雨泥滑滑萬瓦紛披土囊發西園春事一時休

繁紅漫亂胭脂雪綠蘿高張翠羽蓋蒼巖中斷青玉玦
不見枝上一點紅千頃桑麻光似潑

小園花柳春爭發風雨顛狂二三月斷梗梢空轉若蓬
細紅糝逕繁如纈巨看繞屋溜潺潺可厭觸塗泥活活
不妨暫柅故人車大似陳公井中轄

吳門道中

小橋分路各西東寂寂松牕半掩蓬客夢悠揚殘酒裏
一池荷葉雨聲中

連雪苦寒

霜氣森森背有芒風稜撼撼面疑鎗
破衾且作龜頭縮短裾愁牽鶴脰長

焦山吸江亭

昔年攜客寄僧龕敗屋疎籬一草菴
白首重來看修竹

連山樓觀亦耽耽

東坡詩云金山樓觀何耽耽
鐘擊鼓聞淮南焦山何有有修竹
採薪汲

水僧
兩三萬頃蒼茫一島孤
潭潭雲海現毗盧
問君汲盡西

江水中有曹溪一滴無

雨中泊蜀山見漁人自山半負樵入舟鼓棹而去
一嶂橫青靄千漚起碧濤行穿山半腹坐占水中心蹋
雨松蹊滑衝烟蓼嶼深時來有登涉應不繫舟沈

讀類說二首

亡是談烏有彭郎得小姑誰言鳩作婦謾道雁爲奴絡
緯那能織提壺豈解酤龜茲堪一笑非馬亦非驢
額痒會出耳足閒仍有毫石頑非作燕楮老孕生雞枏
癭那因怒松枋豈是肥君看轉丸手亦復化神奇

能仁寺悟上人來楓橋訪余索詩賦兩絕句

樵斷吟鬚皺兩眉鏤冰琢雪等兒嬉解啼孤月如雞口

堪笑窮郊作許悲

韓吏部詩云有窮者孟郊郊聞雞詩云似聞孤月口能說落星心

老去都將筆硯焚相逢相問只寒溫更無一語堪酬對已入維摩不二門

龜潭

擺落攀緣斷驅除磊塊平庭松敵老健潭水伴孤清待月出時看尋雲起處行相隨木上坐徙倚到參橫

舟過湖汊泊丁山

雞犬三家市蓬蒿一畝宮
蘿牽籬幕翠籬墮砌堆紅
宿鳥來還去微泉咽復通
幽尋殊未已落日滿陳桐

日下殘紅斂烟升積翠重
鷗輕沒浩蕩魚樂自從容
野饁迎秋穫鄰謳相夜舂
田翁有真意一笑酒中逢

協趣亭

一丘破天巧萬壑迴春姿
使君載酒地不著鼓吹隨
脩然一幅巾自與幽人期
水淺欲平杯風細不滿旗
疎疎

殘雨裏獨理釣魚絲

江上懷思永

沙老猶生觜江寒已伏槽長烟分聚落短日下亭臯木
脫曾巢見潮生小艇高幽懷誰與悟不見酒中豪

梅二首

北風翦水玉花飛翠袖凌寒不自持脉脉含情無一語
水邊籬落立多時

纖纖蘿蔓牽茅屋細細苔花點石砭夢斷酒醒山月吐

一枝疎影卧東牕

龜潭道中

沙淨溪行好烟消野望新
數峰山戴雪一曲塢藏春
魚逐波間伴禽藏葉底身
柳邊春信動睂目已津津

牛山道中

松雲翠離披竹日光破碎
青熒麥風過紅濕花露墜
萍開龜曳尾樹啄鳥擘喙
物物如賦予欣然與心會

罨畫連雨溪漲又餘雨
霽水落喜而賦詩二首

編棧沿村徑囊沙壅市門蒼鱗封老幹黃耳上陳根屋
破容身窄天低望眼昏谿邊高樹杪猶有繫舟痕
月挂樓鐘曉風生島樹秋林疎山獻狀池漫水分流鵲
喜時窺牖鷗馴亦並舟一聲何處笛莫遣碧雲畱

沈公序餘閒亭二首

貌古須眉見情高耳目遺應諧聊玩世避諉莫吟詩事
不關心處身非抱病時翛然無一事痛飲是吾師

隱几欲忘吾趨營老吏疎判閒聊命酒引睡漫翻書祗

有貧堪逐都無憤可攄樂哉聊卒歲應信我知魚

虎丘沼老豫章詩僧也與余相遇於楓橋方丈誦
所作徐獻之侍郎生日詩有東湖孺子南極老
人之句余愛其工賦小詩寄贈

落景下曾城遙烟起孤戍繫舟著斫魚磯曳杖扣僧戶

忽逢丹霞侶自誦碧雲句噌吰應黃鐘清絕追白紵不
落江西派官學邯鄲步冥搜自天得妙中有神助寅緣
半日畱邂逅一笑遇詎復管中窺看沐南山霧

紹興士子

某

南遷過疎山上一覽亭見擬東坡喂

芋詩刻龕之壁間詩律句法良是殆不能辨乃

宣卿侍郎守臨川時所擬作也後數日道次安

仁縣一士人吳君出宣卿詩數十解示余奇麗

清婉咀嚼有味如噉蔗然讀之惟恐盡於是拊

卷三歎而後知公置力於斯文久矣又二十年

宣卿築室荆溪山中別營一堂以平生所畜東

坡詩文雜言長短句殘章斷藁尺牘游戲之作

盡櫝藏其中號景坡自書榜仍為記刻之

某欲

具小舟造觀而宣卿召用今以集撰守吳門乃

賦詩為之先

王公製練衣謝傳捉葵扇欬若置郵然一昔徧海縣東
坡百世師乘雲上騎箕文爭日月光氣敵嵩華齊諸儒
望先覺坐待成風斷一斤應手揮郢鼻無畱壘公生不
並時闢捷同一機識真屬具眼造的令中看詩亡束皙
補書受伏生所神交接混茫參差夢中睹授我筆如椽

五色光屬聯醉上金鑾殿揮泉灑謫仙

景思提舉少卿出示藥寮佳篇

某

繼元韻上呈

連筒自灌黃精圃結轍休推惹
茲車萬壑飛泉春午枕
一蓑帶雨荷春鉏逃名尚有身為累
擇利焉知貨可居
笑指吾公門上莠一時零落已丘墟

宋詩鈔卷四十七